

Date – 18/03/2026

Time - 18:30 -18:40Hrs

AKASHVANI AIZAWL

HEADLINES (EVENING)

1. Chief Minister Pu Lalduhoma'n Mizoram chu Hmeichhiate hmasawna ram a nih avangin khualzinten ngaihvenin an sawi darh mek a ti.
2. Mizoram State Election Commission chuan Aizawl Municipal Corporation inthlan vote thlak ni atan thla leh April ni 21 a ruat a, April ni 27 ah vote chhiar a ni ang.
3. Kolasib bawhsap Pu Robert C. Lalhmangaiha chu vawiin chawhnu khan Aizawl Civil Hospital-ah a thi.
4. Rajya Sabha chuan vawiin khan member 59 an thlah.



INTERNATIONAL WOMEN'S DAY

Chief Minister Pu Lalduhoma'n Mizoram chu Hmeichhiate hmasawna ram a nih avangin khualzinten ngaihvenin an sawi darh mek a ti.

IWD Organizing Committee, State Hub for Empowerment of Women, Directorate of Women & Child Development buatsaih, International Women's Day 2026 lawmna hun a hmanpui na ah he thu hi sawiin Pu Lalduhoma chuan Mizote chu hmakhawsang atanga hmeichhiate dinhmun dah hniam ve lo tia sawi theih an ni tiin, an chan chhiatna lai ber nia lang thin, 'mak chhiat' an tawh chang emaw, 'sum chhuah' emaw-ahtea dinhmun chhe taka an awm thin chu, sawrkarin The Mizo Marriage & Inheritance of Property (Amendment) Bill, 2026 a pawm tak hmangin, dinhmun tha zawk leh zahawm zawkah a hlangkai tih a sawi a. Mipa leh hmeichhe tih tlan theih leh nih tlan theih china tehin Mizoram chu India rama hmeichhiate dinhmun that berna state zinga mi a nih a rinawm thu sawiin Hmeichhiate hmasawna ram a nih avangin khualzinte pawhin an rawn ngaihven a, an sawi darh mek tih a sawi.

Pu Lalduhoma chuan WCD hnuai kalpui, central sawrkarin hmeichhiate hamthatna leh venhimna lama hmalakna sawiin, a hlawhtlin theih nan sawrkar pawh a tang hle a ti a. Mizo hmeichhiate chu anmahnia theihna ropui tak awmte hmanga ram leh hnam tana bei zel turin a sawm a ni.

Khualzahawm Pi Lalrinpuii pawhin thu sawiin, Kumin Women’s Day chu a ni takah lawm ni thei lo mah se Mizo nunphung chawisangin mi changhai zawkte tanpui nan te, dam lo kan nan leh bai insuahtawn nan hman a nih thu a sawi a. IWD thupui angin dikna, rorelna dik leh hmalakna te chu hmeichhia leh naupang zawng zawng tan a ni tih hre thar a, an hmeichhe nihna hman tangkai a, midangte tanpui nana mawhphurhna la thar turin kalkhawmte a sawm a, Women’s Day chibai a buk a ni.

<><><>

INDIGENOUS GAMES & CULTURAL FESTIVAL 2026

Doordarshan Mizoram Indigenous Games & Cultural Festival 2026 chu vawiin atanga neih tan a ni.

Doordarshan Aizawl leh Mizoram Indigenous Games Association (MIGA) thawkdunin an buatsaih inelna hi Ramhlun Sports Complex-ah neih niin, Art & Culture Minister Pu C Lalsawivunga’n he hun hi a hmanpui a. Khuallian chuan Indigenous Games hian Mizo kan nih anga tihdan leh nunphung, culture a bet tlat infiamna a chawinung thar leh dawn a ni, a ti.

Pu C. Lalsawivunga chuan Mizo nihna anga hnam infiamna, hnam nunphunga bet tlat chawinun thar leh nana hun buatsaih chu lawmawm atih thu sawiin thangthar ten infiamna chi hrang hrang an neih te an lo hriat thar a, an lo chawikan chhunzawm nan leh a hrela te tana hriat thar leh theihna tur anih theihnan a duh thu a sawi a, hnam nunphung leh tihdan thin pi pute atanga hnam intihhlumna leh in el nana hman thin chu ngaihhlut thar la pawimawh thu a sawi baw.

Festival ah hian inelna chi hrang hrang buatsaih a ni a, InBuan ,InSuk nawr, InSaihrupawh, InArpasual, Kalchhet, Invawr, Kawikah, Kalchhet ah te mimal leh pawl anga inel tura ruahman a ni a, vawiina Hawna inkhawmah Chhawkhle Cultural Club (PUC)-te’n Hlado an chham bakah Hnam lam an entir a. DD Indigenous Games & Cultural Festival 2026 hi Zirtawpni thleng neih tur niin hemi chhung hian Mizo infiamna hrang hrang hmangin inelna neih a ni ang a, zan lamah zaithiam te nen hun hman ho thin a ni baw ang.

<><><>

SEC DECLARES DATE OF AMC ELECTION

Mizoram State Election Commission chuan Aizawl Municipal Corporation inthlan vote thlak ni atan thla leh April ni 21 a ruat a, April ni 27 ah vote chhiar a ni ang.

Mizoram State Election Commissioner Dr. H. Lalthlangliana chuan vawiin khan a pisa-ah chanchinbu mite kawmin AMC inthlan chu April ni 21 ah neih tur ani a ti a, vote hi zing dar 7 atanga tlai dar 5 thleng thlak tura ruahman ani tih sawiin AMC inthlan a din tumte tan a hming pek luh theih ni hnukung ber atan tun thla March ni 26 an ruat thu leh candidate inhnuk daw duhte tan a inhnudawhna ni hnukung ber chu tun thla March ni 30 a nih thu a sawi baw.

Mizoram State Election Commissioner chuan inthlan that ngaih palh a awm thu hla-ah, April ni 23 chu inthlan thatna neih ni atan an ruahman thu a sawi a, AMC inthlan a vote tla te chu April ni 27 zing dar 8 atanga chhiar tan a nih tur thu leh,

inthlan kaihnawih zawng zawngte chu April ni 30 a zawh fel vek tura tih a nih thu a sawi bawk.

Aizawl Municipal Corporation-ah hian ward 19 a awm a, heng zingah hian hmeichhiate tan a hauh bik ward hi paruk, ward no 2,4,5,11 leh 12 te a awm a, a bak ward 13 te chu candidate atana mipa leh hmeichhia nih theih ve ve na ward a ni thung a ni.

<><><>

SOUTH CHAWNGTUI

Hnahtial District chhunga South Chawngtui khua te chuan nikum kum 2025 a an hmarcha thar atangin ₹ 9,984,000 (Nuai sawmkua pakua,singriat leh sangli) man an hralh.

South Chawngtui khuaah hian chhungkaw za sâwm paruk(116) ten thlawhhma neiin buh leh sawhthing karah Hmarcha hi an ching a, an thar chhuah zawng zawng hi Quintal zathum sawmriat pali (384) leh kg sawmli panga (45) a ni a. Pu Lalhlengdika ten thar tam berin quintal sâwm pathum (13) an thar a, hmarcha hi an hralhna rate hi a in ang lova a chawhrualin kg ah cheng zahnih sawmruk(₹ 260) vela hralh ang an ni.

Hmarcha te hi mahni rem chan dan ang ang a hralh niin Vai ho hnenah an hralh vek a, a hralh to ber te hian Kg ah ₹ 360 a an hralh laiin a hralh tlawm ber ho in Kg ah ₹ 250 in an hralh a ni.

<><><>

KOLASIB DC DEMISE

Kolasib bawrsap Pu Robert C. Lalmangaiha chu vawiin chawhnu khan Aizawl Civil Hospital-ah a thi.

Aizawl Civil Hospital hotute hnen atanga Akashvani news Aizawlin thu a dawn danin, Kolasib bawrsap hi vawiin chawhnu dar 2:28 khan a thi a, thin thau bawh, thyroid sang bakah zunthlum leh thisen sang nei ni a hriat a ni bawk.

Mizoram Sorkar a Department of Personnel and Administrative Reforms, Civil Service Wing hnen atanga Akashvani News Aizawl-in thu a dawn danin, Pu Robert C. Lalmangaiha hi kum 2008 April ni 15-ah Mizoram Civil Service-ah a lut a, Lawngtlai ADC hna chelh hmasa berin Zawlnuam BDO, Serchhip Sub Divisional Commissioner leh Assistant Settlement Officer Serchhip hna te a thawk a, kum 2013 June ni 26 khan Senior Grade-ah hlan kai a ni a, hemi chung hian Serchhip SDO Sadar, BDO Serchhip bakah Transport Department, Rural Development bakah Food Civil Supplies and Consumer Affairs-ah te Deputy Director hna thawkin Local Administration Department-ah te Deputy Secretary hna a thawk a, Kum 2020 June ni 1-ah Junior Administrative Grade-ah kaisangin Co-Operation, SAD, District Council and Minority Affairs, leh UD & PA-ah te Deputy Secretary hna a thawk leh a, kum 2023 December ni 29 khan Selection Grade-ah kaisangin DC & MA bakah GAD-ah te Joint Secretary bakah Aviation Director-te niin, kum 2024 July ni 9-ah Kolasib Bawrsap hna hi a chelh tan a ni.

Voicecast

Kolasib bawrsap hian taksa lam harsatna neuh neuh neiin, tun Pathianni march ni 15 khan a nawmsam loh zual avangin Aizawlah a lo haw chho a, a nupui Pi Lalbiakhlui leh a fate pathum a kalsan a ni.

Pu Robert C. Lalhmangaiha hi nikum hmasa 2024 Aizawl West II Presbytery Chawlhmun North Kohhran a nghah-ah khan Chawnpui Kohhran Upa tana nemngheh a ni a, naktuk chawhnu dar 1:00 hian Chawnpui Presbyterian Kohhran Biak Inah vui a ni ang a, Chawnpui thlanmual ah phum a ni ang.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

RAJYA SABHA

Rajya Sabha chuan vawiin khan member 59 an thlah. State 20 aiawh Rajya Sabha MP te hi vawiin khan an term a zawh avangin thlah an ni a, an zingah hian hmeichhia 9 an tel a. Prime Minister Narendra Modia chuan thlahna thusawiin ramchhunga mipui rorelna tungding zel tura an tha thawhte hriatreng a ni ang a ti. Vawiina thlah zinga tel ve Deputy Chairman Harivansh chungchang sawiin Pu Modia chuan house chhunga a mawhphurhna hun rei tak a lo tihhlawhtlin tawh avangin lawmthu a sawi a ni.

<><><>

LOK SABHA

Lok Sabha chuan rampuma inthlanpui tumkhata neihna tur One Nation One Election dan zirchiang tura a din Joint Parliamentary Committee te hun a pek belh a. Kumin fur Parliament thutkhawm chawlhkar hnuhnung ber ni hmasa ber thleng hun pek an ni a. He bill hian a tum ber chu tum khata State Assembly leh Lok Sabha inthlan a ruala neih dan tur a ni a. Committee Chairman PP Chaudhary chuan Joint Committee on the Constitution (129th Amendment) Bill, 2024, and the Union Territories Laws (Amendment) Bill, 2024 hun chhung pawhsei dilna motion hi vawiin khan a thehltut a. Voice Vote hmangin motion hi pawm a ni.

<><><>

WEST ASIA

Tukina Israel thlawhnaten Central Beirut an kahnaah mi paruk an thi a, mi 24 in hliam an tuar. Lebanon Health Ministry thuchhuah danin in chim kara ruang awmte finfiah mek an ni a. Sawilawk awm loin Israel sipaite hian mipui bitna lai hmun hi an kap thut niin Lebanon thuneitute chuan an sawi a ni. Hei bakah hian Israel sipaite hian Beirut ah vek hian in chhawng 15 a sang an kap chhhe bawk a. He in hi Hezbollah ten an sum an thuhrukna hmun niin an puh a.

Hetihlai hian Israel khawpui Tel Aviv Iran missile ten an kahnaah mi pahnih an thi a. Hmun tam takah bungrua an kapchhe bawk nia thudawn a ni.

<><><>